

## JOINT PRESS RELEASE

Darlawn khawdai, Ngurawi tlanga Government plantation, kum 1983-a phun, a hmun thenkhat lai (2.5 Ha vel a zau) Far (Pine) thing puitling 600 chuang awmna lai Village Safety Reserve ni bawk chu sorkar atanga phalna la hmasa lovin Darlawn Venghlun VC ten in hmun atana thehin, kumin February thla khan JCB hmanga kawngpui sialin Far thing 48 lai an kit a.

Darlawn DFO thupek angin Range Forest Officer, Darlawn chuan March thla khan VC President hnenah dan lova an thing kih leh an kawngpui sial chu titawp turin tum hnih lai a hriattir bakah June thla khan an thing kihna hmunruak hnawhkah leh nan thingtiak 300 vel lai a phuntir bawk a. August thla khan DFO leh DLAO, Aizawl District te pawhin Darlawn Venghlun VC hi lekhka thawnin an thiltih hi dan bawhchhiatna a nih thu leh ti chhonzawm tawh lo turin an hriattir bawk a ni.

DFO, DLAO leh Range Forest Officer te ngenna leh thupekte chu zawm ahnekin August thla vek khan an kawngpui sial chu chhonzawmin Far thing kung 15 dang an kih belh bakah thingtiak phun tharte chu phawiin an tichhe bawk a. Tin, ni 28.9.2022 a Darlawn Venghlun VC huaihawt a Gram Sabha meeting chuan Pu Lalnunsanga Khawhling, DFO, Darlawn chu a Office leh Quarters awmna, Darlawn Venghlun huamchhunga a luh an khap bawk a ni.

He thil thleng chungchangah hian Indian Forest Service Association (IFSA), Mizoram leh Mizoram Forest Service Association (MFSa) te chuan heng a hnuai a tarlante hi kan puangzar duh a ni:

1. Darlawn Venghlun VC te'n an khaw daia Pine forest (Government plantation) tha tak, an khaw boruak vawngdaitu leh Village Safety Reserve ni bawk chu mimal in hmun atana sem a, kawngpuite siala Far thingte an kit duh hi a zahthlak in a vanduaithlak kan ti a.
2. Darlawn Venghlun VC thiltih hian heng a hnuai a Dan te leh Indian Constitution a bawhchhia a ni.-
  - a) Section 2 of the Forest (Conservation) Act, 1980 – “Use of forest land (Government plantation & Village Safety Reserve) for non-forest purpose without permission”;
  - b) Section 13(a) of the Mizoram (Forest) Act, 1955 – “Use of portion of Village Safety Reserve and felling of trees therein without permission”;
  - c) IPC 186 – “Obstructing public servant in discharge of public functions or duties”;
  - d) IPC 188 – “Disobedience to order duly promulgated by public servant”;
  - e) IPC 425 & 427 – “Mischief causing damage and loss to Government property”;
  - f) Indian Constitution Article 19(1)(d) – “Right to move freely throughout the territory of India”.
3. Darlawn Venghlun VC te hian ni 12.12.1996 a Supreme Court thuchhuak-in “thuneitu diktak hnen atanga phalna la hmasa lova ramngaw thing kih a khap chu ”ngaipawimawh lovin an bawhchhe bawk a ni.
4. Ramngaw, sorkar Pine plantation leh Village Safety Reserve ni bawk, Darlawn Venghlun VC te'n mimal in hmun atana theh a an tichhia hi dan leh thupek bawhchhiatna, khawtlang leh ram tana thil paw tak a niin kan dem takzet a. Chubakah he pawikhawihna titawp tura hmalatu Pu Lalnunsanga Khawhling, Darlawn DFO chu Darlawn Venghlun VC te huaihawt Gram Sabha in office kai thei lo tura a office leh a chenna (Quarters) awmna hmun, Darlawn Venghlun huamchhunga a luh an phal lo hi paw kan tiin kan dem takzet bawk a ni.

**(LALTLANHLUA ZATHANG )**

Secretary  
Indian Forests Service Association  
Mizoram

**(SAMSON THANRUMA)**

Secretary  
Mizoram Forests Service Association ,  
Mizoram